



B. N. C.
FIRENZE
1102
9



1102.9



u
6

40

1102.9




DE LAUDIBUS
IOSEPHI AVERANII

ORATIO

HABITA IN FLORENTINO LYCEO
ANNO MDCCXXXX.

PRO SOLENNI INSTAURATIONE STUDIORUM
AB ANGELO MARIA RICCIO
GRAECARUM LITERARUM PROFESSORE:



FLORENTIAE . MDCCXL.

EX TYPOGRAPHIA CAIETANI ALBIZINII.

Transitum permisso.



*Alf. Lucc. C. G. D. Lami n. a. 1791. amicizia
di Giovanni Lami.*

1102.9

❧ (III) ❧

AMPLISSIMO AC NOBILISSIMO VIRO

MARCHIONI

GABRIELI RICCARDIO

CANONICO FLORENTINO.

ANGELUS MARIA RICCIUS F.



Sapientissimi hominis laudatio, quae nuper a me dicta est, in vulgus prodiens tuum in sinum suo quasi iure convolat, Vir praeclarissime. Cum enim Iosephum Averanium semper suspexeris; & ex intimo sensu amaveris, quod Te contubernio suo exceptum Pisis liberalibus disciplinis plures annos instituerit, & suavissimos mores tuos, atque ornatissimos quam maxime probans propensioris cuiusdam voluntatis significationem erga Te dederit, putavi nullâ acceptius, quam Tibi eius laudum praeconium fore. Sed ea quoque de causa oratio haec Nomini tuo fuit inscribenda, ut gravissimus esses testis eorum, quae de illo a me praedica-

A 2

cata

❧ (IV) ❧

cata sunt , videlicet quod nulla sermonis exuperantia , sed ad historiae fidem , quis , quantusque fuerit Vir ille maximus , enarraverim ; nemo enim cum eo arctiori , quam Tu , consuetudine ad vitae exitum iunctus fuit . Ceterum quid laudes tuas modo attingam ? iam notae sunt , ac multis Voluminibus doctissimorum hominum , qui eas celebrarunt , vulgatae ; adeo ut splendido meridie facem accendere videar , si eas referre instituam . Quod si ea omnia testimonia deessent , unum Iosephi Averanii iudicium , qui Te maximo in pretio habuit , impenseque dilexit , ad Te laudandum abunde sufficeret . Non enim huius Viri prudentissimi , ac sagacissimi iudicium ex amore , sed ex iudicio amor . Demirabatur nempe in Te iuvene nobilissimo modestiam singularem , summum Religionis obsequium , flagrantissimum in Literas , ac Literatos studium , incredibilem optimorum Librorum aviditatem ; videbat Te nobilitatem virtutis longe pluris facientem , quam auiti Generis splendorem , ceteraque ornamenta tua , quibus amplissime condecoraris ; videbat , rectoque iudicio statuebat Te singulariter amandum , omnique benevolentia complectendum . Quare , tua consuetudine frui non solum ei dulce semper fuit , atque exoptatum , sed adhuc vivens sua pignora , quibus nil sibi carius , hoc est luculentissima scripta sua fidei tuae committere , ac servanda relinquere voluit . Hoc igitur quaecumque optimi Praeceptoris tui , Tibique ex animo amici ἐχάρμην excipe , protege , tene , mibique , qui illud scripsi , tuo ad Graecas literas condiscendas olim duci amorem tuum impertiri perge . Vale .

ORA-

❧ (V) ❧



O R A T I O

HABITA FLORENTIAE ANNO MDCCXXX.
PRO SOLENNI STUDIORUM
INSTAURATIONE.



IOSEPHUS AVERANIUS

*Doctrinae , Probitatis , atque Humanitatis
absolutissimum exemplum fuit .*



Iremini fortasse , ornatissimi Auditores,
me hominem , qui modico utor inge-
nio , ac parum valeo facundia , argu-
mentum hodie pertractandum suscipere,
quod magnitudine sua oratores vel maximos fa-
cile deterreat . Si enim Isocrates tantus orator
in ea elaboranda oratione , quae panegyrica
inscribitur , atque Atheniensium laudes persequi-
tur , decem totos annos insumpsisse fertur , non
minori sane temporis spatio , nec minus egre-
gio oratore opus esse videatur ad summi ac
praestantissimi Viri laudes , de quo sum vobis

A 3

ver-

❧ (VI) ❧

verba facturus , digne concelebrandas . Iosephum siquidem Averanium (quo nomine virtutem , ipsam , & consummatissimam quamdam sapientiam designari sentio) laudaturus in hunc locum ascendi . Nihilominus , auditores , ut verum candide fatear , id quod alios fortasse frangeret , & a dicendo absterreret , me recreat potius & confirmat , facitque ad dicendum alacriorem . Nam quod tam eximius , magnusque est Vir ille , quod adeo supra alios virtutibus eminet , quod tam celsum gloriae tenet fastigium , exquisitioris eloquentiae arte , qua exornetur , non videtur indigere . Instar enim Solis ipsemet suo se splendore ornat , & collustrat , sibi que ascita laudatoris luce nihil est opus . Quamobrem si tam praeclaro Viro parem orationem exiguitas ingenii mei afferre non poterit , paratum habeo bonum veluti clypeum , quo me tegam , elegantem Manilii versiculum

Ornari res ipsa negat , contenta referri .

Satis quippe erit ea , quae illum condecorant , ornamenta animi singularia quasi digito vobis commonstrare , optimi iuvenes , ut in iis oculorum aciem defigentes ex ea contemplatione bonum aemulationis fructum colligatis . Huc enim consilium meum collimat , quo argumentum hoc ad dicendum delegi . Cum enim iniunctum mihi munus a me exigat , ut literariis recurrentis anni studiis solenni hortatione praeludam , existimavi

❧ (VII) ❧

stimavi me acriores stimulos vobis admove-
 re non posse, quam si nobilissimum hoc exemplum
 non quidem extraneum, sed patrium, non an-
 tiquum, sed recens vobis ad imitandum pro-
 ponerem. Itaque Averanii encomio & studiosos
 iuvenes utiliter commonebo, vosque quotquot
 adestis, auditores inclýti, magnifice delectabo,
 & patriae huic debitum iampridem officium per-
 solvam, ut tantus eius Civis publica laudatione
 celebretur, qua admirationem apud posteros pro-
 mereatur. Sed quoniam ingens tam vasti argu-
 menti moles me videtur obruere, partes aliquas
 mihi sumendas esse censui Homeri instar, qui
 ex partibus Heroës laudare consuevit. Ex eo-
 rum igitur paene immensa copia, quae laude
 digna admirandus plane Vir omnigenis doctrinis
 eruditus, vere probus, & in omnes humanissi-
 mus in se collegit, quaedam solummodo com-
 pellor attingere. In summa eo contraham ora-
 tionem meam, ut Doctrinae, Probitatis, atque
 Humanitatis absolutissimum exemplum Averanium
 vobis proponam. Dum ergo talem fuisse brevi-
 ter, ac verissime doceo, perpurgatis auribus di-
 centi mihi operam date, studiosissimi iuvenes.
 Si enim quae de illo sum vobis praedicaturus,
 attento docilique animo excipietis, & ad hanc
 praeclaram normam, regulamque vos ipsos con-
 formare statueris, me nihil melius, atque uti-
 lius ad vos cohortandos hodierno sermone af-
 ferre potuisse plane liquebit.

Cum igitur a doctrina, in qua celsissimum

❧ (VIII) ❧

gradum Averanius tenuit , ordiendum mihi sit , legum scientia , quatum consultissimus fuit , confestim mihi sese offert , iusteque petit , ut de illa primum omnium verba facere instituam ; quod eam tanta cum dignitate quinquaginta circiter annos in celeberrimo Pifarum Lyceo professus sit . Huius profecto facultatis praeclarissimae , quae moderatrix ac regina rerumpubl. iure optimo appelletur , non extima quadam cognitione , ut plerique faciunt , contentus fuit , sed intima ac magis recondita pervasit penetralia , neque ieiunam , inopem , sterilemque studiosis adolescentibus tradidit , sed selectissimae cuiusdam eruditionis divitiis uberrimis locupletatam . Quidquid in ea latitat ab ultima antiquitate scitu dignum , solertissime eruit ; quidquid ad eius speculationem , usumque attinet , cumulate novit ; quodque maxime commendandum est , superfluos , atque inutiles stolones , ac deflexus , tamquam communem quemdam morbum , dum in eius tractationem incubuit , semper excidit . Iure igitur ut iurisprudentiae oraculum passim consulebatur , eiusque responsa veluti ex ipso iustitiae tripode reddita summa cum veneratione fuerunt semper excepta . Sed quid tamdiu versor in hac enarranda laude , quam in legum cumulatissima cognitione promeritus est longe maximam ? Equidem ad cognoscendum qualis , quantusque in ea extiterit , satis esse puto , siquis Magni illius Benedicti non minus eloquentia , plenissimaque eruditione , quam

co-

❧ (IX) ❧

colendae veritatis studio , ingenuoque animi candore spectatissimi (ut pote qui omnem prorsus adulationem averfaretur) gravissimum animo recolat testimonium . Is cum fratres suos Iosephum & Nicolaum Iurisconsultorum ornamentis ac laureolis insigniret , & modestiae legibus ne liberior germanos suos collaudaret , impediretur , tamen sibi temperare non potuit ; quin de utroque quod erat verissimum diceret , videlicet tum in reliqua doctrina , tum maxime in legum intelligentia mirificas fecisse , cum adhuc essent adolescentes , progressionēs . Quid igitur de Iosephi praestantia in hac facultate putandum qui nulla temporis interruptione ad extremam usque senectutem impensissime iuris studia excoluerat , ac diligentissime pertractaverat , in quibus vix primos pubertatis annos egressus adeo excellerebat ? Quamquam vero eius doctrina hac in parte fuerit longè maxima , ne credite tamen , auditores , in ea tantummodo ornanda orationem versari meam . Cum Averanii doctrinam dico , omnigenam doctrinam dico , illam videlicet doctrinam , quam Graeci aptissimo verbo dixerunt ἐγκυκλοπαιδείαν . Philosophus ergo quidquid in tam multiplici variaque natura rerum , a supremo Opifice effectarum abditum est pervestigare , atque omnes philosophorum tum veterum , tum recentium sententias sapienter expendere valuit . Maxime vero eam philosophiae partem , quae mores format , adamavit , & apprimè scivit , sibi que turpe duxit co-

gni-

gnitione haustam non etiam vita studiosissime exprimere. Historiarum omnium catenatam seriem tenuit. Nihil in Geographia, cuius vastitas universa terrarum facie definitur, illum latuit; nihil in Mathematicis disciplinis astruosioribus, nihil in Apollonii doctrina, nihil in Archimedis, aliorumque Auctorum quorumcumque praeclarissimis inventis. Norunt omnes; quibus difficultatibus salebrisque caeli, siderumque scientia obsepta sit. Etiam ad eam comparandam Iosephi animus caelestium capax accuratorem adhibuit; resque illi tam feliciter cessit, ut Ptolemaeum clarissimum caeli interpretem, cuius libri in magna rerum & verborum obscuritate versantur, (libet dicere ipsis verbis verissimi testis Benedicti supra ante memorati) inter sidera spatiantem, & abditissimae naturae arcana rimentem & permeantem per se nullo duce sit affecutus. Quid de sacra doctrina? Dixisses uni Theologiae assiduam impendisse operam; adeo profunde, subtiliter, vere de omnibus, quae ad illam attinent, differebat. Neque id mirum, auditores, divinas siquidem Literas, sacros Ecclesiae Canones, Conciliorum decreta, Sanctorum Patrum Volumina incessanter versabat, atque animo retinebat. Iam vero ad se pertrahunt orationem meam humaniores Literae, atque ut doceam, quantum in eis eminuerit literatissimus Iosephus, postulant. Quam longe lateque earum pateat ditio probe nostis, eruditissimi auditores; adeo ut in his literis permagnus, maximeque ingeniosus

niosus iudicetur, si quis bonam aliquam earum partem sibi asciscere valuerit. At de Iosepho non ita est iudicandum. Totam humanioris, variaeque eruditionis amplitudinem, quantamlibet esse censuerimus, excurrere visus est, suoque pectore comprehendere; suo scilicet ipsius testimonio latius protendi humani ingenii fines demonstravit, quam vulgo creditur. Hinc factum, ut eius doctrina tot, tantisque cognitionibus cumulata nequaquam levis fuerit aut ventosa, sed gravis, solida, plena; quam proinde auro bene comparare videar, quod humanam aestimationem non solius coloris pulcritudine, sed densitatis, ac gravitatis pretio sibi conciliavit. Ceterum, cum literae politiores poëticae, atque oratoriae nobilissimarum facultatum laudem praecipue persequantur, utrumque valuit stadium strenuissime decurrere Averanius noster, Poëta, & Orator insignissimus. Quamquam enim non adeo frequenter carmen condiderit, licuit tamen, si ei colluisset. Cum enim mentem sibi diviniorem, osque magna sonaturum contigisse ex iis, quae interdum scripsit, carminibus liqueat, quis dubitet illum non potuisse longe plura, atque uberiora scribere, in iisque gloriam poëtae ubique optimi promereri? Sed quia publicae, quam gerebat, iurisprudentiam interpretandi provinciae studium poëticae scriptionis non multum congruere arbitratus est, ab ea prudentissime sibi abstinendum statuit, gravioremque eloquentiam gravitati muneris sibi demandati accommodatio-

datiorem ac decentiorem per campos Oratorum incedens maluit confectari . Non ego hic praedicem , auditores , quot , & quanta , omniaque utilissima , ac plane admiranda Vir hic eloquentissimus Latina praesertim oratione scripserit , quae cum essent dignissima , ut in vulgus emitterentur , dolendum maxime eorum vix unum , aut alterum publicam lucem vidisse . Id tantum dicam tam nitidum , atque elegantem in scribendo fuisse , simulque tam solidum , severum , gravem , ut talis eius oratio fuisse videatur (quod de L. Crasso dixit Tullius) qualis in bono aedificio firmus paries , ac satis splendens ; nam in eo erat Latine loquendi accurata , & sine molestia diligens elegancia , in disserendo lucida explicatio , nativusque quidam ubique lepor , non ascitus . Fuit , qui unum Demosthenem putaret habuisse orationem vivam , ceteros omnes elaboratam malleo . Nimis id praesidenter , atque invidiose dictum non temere suspicabimini , auditores , cum aliis nonnullis tum Graece , tum Latine dicendi gloria inclytis laus haec tribuenda esse videatur . Iosephum certe Averanium Latina eloquentia praestantissimum , & mira in dicendo gravitate , iucunditate , brevitate , proprietate , facilitate cum paucissimis conferendum ea laude dignum sine ulla controversia iudico . Quam felix autem , exprompta , ac paene sponte sua exundans in eo esset Latine scribendi facultas argumento satis esse puto doctam illam dissertationem , quam de Pignorationibus

❧ (XIII) ❧

nibus olim nulla meditatione scripsit ; scripsit ? imo extemplo fudit , dixitque coram Re-
gio Saxoniae Principe Friderico ; qui Sarmatiae
hodie regnum obtinet , Pisis tunc agente . Hanc
plane ab erudito amico ante aliquos hos nenses
mihi ostensam non sine intimo voluptatis sensu
semel , iterumque legi . Neque vero putate , au-
ditores , dum tanta excelluit in Latine scribendo
praestantia , non item in Etrusca scriptione ex-
celluisse . Utrobique admirandum se praestitit ,
utrobique maximum ; ut enim Latini , sic patrii
sermonis longe optimum , purissimumque com-
biberat gustum . Consulite quaelo castigatissi-
mas , quas de acerbissimis Servatoris nostri cru-
ciatibus in nobilissima patriae linguae Academia
dixit , catenatas disputationes . Ex eis quanto
nitore , ac robore Etruscam orationem instrue-
ret facile pernoscetis . Nihil de Graecis literis
dico , in quarum cognitione tam longe proces-
serat , ut nemini secundus eas laudatissime pro-
fiteri posset . Ceterum cum usque a puero do-
ctrinae studiis mirum in modum teneretur , tan-
tumque in literis adolescens profectum faceret ,
ut eum evolare , non excurrere praeceptores di-
cere solerent , aetate deinde provectior ingen-
tem , ac fere immensum doctrinae collegit the-
saurum , qui in partes divisus locupletandis be-
ne multis affatim suppetere potuisset . Numquam
enim diversarum nobilissimarum facultatum stu-
dia intermisit , quarum unamquamque sagaci tem-
poris dispensatione tam probe excoluit , ut illis
uni

❧ (XIV) ❧

uni navare operam videretur ; quare factum , ut omnes pariter excoleus , in omnibus pariter excelluerit . Cum vero infirma plerumque uteretur valerudine , viresque corporis iamdudum in eo essent affectae , debilitatae , fractae , numquam tamen vigor animi obtusus . Suberat virium , imbecillitati mentis robur invictum . Ferreus , atque adamantius in ipsis diuturnis morbis quo lentioribus , eo molestioribus ad studia literarum videbatur a natura factus ; libris siquidem impallescere , immori magno sibi lucro deputabat . Siquis autem a studio illum avocare vellet , rogaretque ut nonnihil laxamenti ac veniae sibi permitteret , lapides illi loquebatur . Nam sine literarum studio vitam sibi insuavem ; cessationemque a doctrinae exercitamentis mortis quoddam genus ipsa morte tetrius , acerbiusque esse ducebat . Ita sane natura comparatum est , auditores , ut qui doctrinam degustaverit , eiusque intimo sensu affectus fuerit , quo magis in illa creverit , eo flagrantius illam appetat inexpleta quidem , sed honestissima cupiditate . Atque hinc factum , ut Averanius uberima , egregiaque doctrina , quam sibi studiosissime ascivit , se patriamque suam tam ingenti gloriae splendore condecoraverit . De Epaminonda scriptum me legere memini , quod ipse unus pluris , quam civitas fuit . Dicam audacter , quod res est , nec verebor , ut aegre feratis , optimi auditores , siquid a me liberius expromitur ; novi enim vestrum veritatis studium . Io-
se-

sephus Averanius singulare fuit urbis nostrae decus, atque ornamentum, adeo ut si tot alii deessent praeclarissimi in doctrina cives, qui singulis aetatibus eam mirifice illustrarint, celeberrimamque inter ceteras Europae urbes effecerint, ipse unus ad eam satis superque illustrandam suffecisset. Summa igitur erat in Iosepho doctrina, plurimaeque literae, nec eae vulgares, sed interiores quaedam & reconditae, summa etiam orationis gravitas, & elegantia, ob quam cum priscis aureae illius Latini sermonis aetatis conferri mereretur, atque haec omnia vitae decorabat dignitas, & integritas. Iam ad eum locum orationem meam devenisse sentio, ut postquam praeclarissimum doctrinae exemplum Averanium fuisse docui, doceam modo fuisse pariter probitatis. Qui animo vitiorum labe, maculisque inquinato honestissimas disciplinarum speculationes, doctrinaeque castissima studia immiscet, idem plane agere videtur, ac si coenoso puteo liquidissimam infundat aquam, quae & coenum conturbet, & suam ipsius contamine puritatem, quod olim Pythagoricus Lysis in epistola ad Hipparchum verissime scripsit. Quo facile referri posse puto sapientissimum Horatii monitum.

Sincerum est nisi vas, quodcumque infundis, accescit.

Sed (quod maxime dolendum est) non ita multi aut animum purgatum vitiis afferunt do-
ctri-

❧ (XVI) ❧

doctrinae studiis, aut vitiis inquinatum doctrinae studiis perpurgant. Quo malo accidit, ut literae foedo veluti vasculo acceptae & ipsae foedari, misereque corrumpi videantur. Atque hinc conspicimus, experientia teste, doctrinae consociatione improbitatem non raro fieri procaciorē. Pendet igitur doctrinae bonitas, pretium, integritas, commendatio a probitate morum, vitaeque integerrimis institutis.

————— *Alterius sic*
Altera poscit opem res, & coniurat amice.

Iam vero videndum, auditores, qualem, quantamque vitae probitatem eximiae doctrinae, quam priore orationis parte explicavimus, Averanius noster adiunxerit. Virtutis colendae propositum certum, firmum, fixum illi fuit, de quo nulla ratione pelli, neque moveri umquam potuit. In optimo siquidem vitae instituto, quod ab ineunte aetate coepit, in eo perstitit, & longius progressus est, numquam in virtutis cursu defatigatus. Neque enim philosophiae studium sumpsit ad meram animi delectationem, sed ad vitae constantiam. Itaque omnis in eo aetas tenebrosa vitiorum inquinamenta averfata, pulcherrimo virtutum splendore mirifice enituit. Cumque in multis a foeda iuventute morum turpitudine in succedentes aetates traducatur, interdum etiam improbitate auctior transmittatur: contra in Iosepho factum est,

est , ut castam iuventutem castior exceperit virilitas , hanc vero castissima senectus subsecuta sit . Aequè enim aetate qualibet turpe duxit pravam voluptatem in virtutum concilium adducere , studuitque voluptatem maximam adipisci reiecta voluptate . Cum igitur hac vitae fuerit integritate , summaque castimonia , non mentiar , si illum dixerim iuvenem senibus , tiro- nem veteranis , novitium exercitatis ut virtutis exemplum proponi consuevisse . Quis illo prudentior ? quis temperantior ? quis iustitiae aman- tior ? quis pudore , modestiaque ornatior ? quis sanctissimae Religionis studiosior ? Quis ab ob- trectatione , invidiaque , quae solet lacerare plerosque , alienior ? Neque ob eam causam honestum amavit , quia laudetur a multis , sed quia (etiamsi omnes obmutuerint) sua pulcri- tudine est , specieque laudabile . Cum autem probus esse vellet , non videri , sapientesque mores magis factis monstrare , quam dictis , aver- sabatur quammaxime superciliosum genus illud hominum , qui minus probitatis habentes intus , speciem foris affectant cuiusdam consummationis virtutis , tristesque vultu venditant sanctimonias . Sed longum esset , ac prolixum singulas eius virtutes , quibus cumulatissime eius probitas con- stitit , dicendo persequi , auditores . Sinite ergo , ut ceteris praetermissis ad eam unam oratio mea se vertat expendendam , quae in eo maxime ceterarum omnium paene ad miraculum eluxit . Quam virtutem intelligam , videmini mihi non

B

pau-

❧ (XVIII) ❧

pauci , qui hominem nostis , continuo persentiscere . Insigniffimae scilicet patientiae illius facienda est mentio , qua tam longi temporis morbum , acerbissimamque molestiam erecto , excelsoque animo semper tulit . Multa de antiquis philosophis , qui malorum vim , gravesque cruciatus patientissime tolerasse dicuntur ad ostentationem scenae gaudentis miraculis aptiora , quam ad fidem scripta plerique censuerunt . Quod plane iudicium nec probare , nec refellere statui . Dicam solummodo hanc in Iosepho virtutem fuisse tam praeclaram , tam firmam , tam diuturnam , ut nisi nostris oculis vidissemus , illam ab aliis narratam non facile admitteremus , sed narratione artificiose ad miraculum aucta fucum nobis fieri suspicaremur : Etenim date mihi hominem , qui literatum studia impensissime amet , iisque inhaerere unicam experietur vitae iucunditatem , qui nihil aliud magis , quam commisso sibi munere perfungi , sapientiamque studiosis adolescentibus tradere exoptet ; morbo tamen impediatur , ne quod flagrantissime cupit , exequi valeat , non unum , alterumve mensem , sed complures solidos annos , spe recipiendi vires paene abscissa , & ad solum dolorem relicta vita , putamusne hunc hominem , quamquam philosophiae clypeo adversus dolores , perturbationesque paratum , quamquam *merito sapientiae tinctum* (ut ait Arnobius) & *saturum potu* non aliqua identidem affectum iri aegrimonia , non aliquem questum ad allevandam ,
quam

❧ (XIX) ❧

quam sustinet , calamitatem emissurum ? Profecto ita res habet , auditores , aliquid naturae dandum , aliquid dolori permittendum ; cumque philosophus quilibet vel spectatissimae virtutis , homo sit , nequaquam putabimus humana omnia ab eo aliena esse oportere . Quamquam autem haec vera de aliis sint , non ita tamen de Averanio opinandum ; qui quatuordecim annorum spatio assiduo dolore divexatus , ac lectulo affixus , humoribus , qui corpus interfluunt , acore corruptis , gracilesque artus veneno pertinacis febriculae depascente , & ad miseram macritudinem redigente , nullam umquam edidit vocem parum se dignam , nullo umquam questu cubiculum illud , in quo tamdiu iacuit inclusus , moribique veluti compede ligatus , personavit ; numquam calamitatis vi fractus , superatus , aut de gradu deiectus est ; etsi ea calamitate nihil sibi gravius , importunius , acerbius posset accidere ; etsi nil vehementius cuperet , ac studiosius curaret , quam revalescere , ut ad Pisanum Athenaeum suum regredi , & sapientiae studia avidius repetere sibi liceret . Dixisses scopulum , quem virtus in procelloso humanae vitae freto adversus malorum ingruentes fluctus immotum faceret ; dixisses Olympi vertice sereniorē semper , & tranquilliorē , omnes prorsus angoris nubes , animique perturbationes subter se habentem . Multa tum de hac singulari Iosephi virtute , tum de aliis dicenda de industria refeco , auditores , ne prolixiori , quam par est , oratione vos

obruere videar, adeoque indicabo potius, quam narrabo non solum adversus doloris diuturnitatem incredibili quadam fortitudine armatum ac munitum valuisse, sed coram mortis imagine diu sibi ante oculos obversante, numquam expalluisse, eiusque gladio ultro iugulum attemperasse. Eos omnes, qui non tam hominis amicitia, quam consuetudine ducti (quorum unum me fuisse confiteor) ad eius lectulum tamquam ad pulcherrimum Christianae fortitudinis spectaculum confluebant, lethique horam opperientem non sine erumpentibus lacrymis demirabantur, eos inquam omnes testes appello, quam alacriter collecto pallio plenus bonae spei, quam sua sibi probitas afferebat, ad capeffendum aeternitatis iter contolleret gradum, quam viriliter, placideque expectaret, dum e tenebris, ac vinculis corporeis ad lucem libertatemque transferretur. Oh invictum animum! oh generosum, & beatum virum! oh inter summos, consummataeque virtutis Heroes recensendum! qui ut doctrinae, ita probitatis immortale omnibus exemplum statuisti. Fruere ad piorum sedes translatus, ut non temere arbitramur, fruire sempiterno probitatis tuae exoptatissimo praemio. Exple in ipso beatissimo, atque inexhausto aeternae sapientiae fonte illam tuam omnigenae sapientiae avidissimam sitim, qua mortalem in hisce terris vitam agens usque a puero indefinenter flagrasti. Vereor, juvenes, ut cum hominem vobis descripserim tanta doctrina ac probitate instructum, tetri-

tetricum fuisse existimetis , quales complures esse videmus , qui severam , ac tristem affectant disciplinam , non utili sane , nec laudabili consilio ; nam per eos ipsa virtus aut odiosa redditur , aut certe parum amabilis . Verum nil tale in Iosepho Averanio suspicari licet , auditores . Nemo illo extitit umquam comitate , lepore , omni-que humanitate perpolitior . Nam quod maior esset invidia ; quod nullius obtrectionibus obnoxius ; quod dictaturam una paene consensione omnium sibi delatam in Pisano Lyceo gere-re videretur ; quod ut nullam rationem afferret , ipsa auctoritate (quod Cicero de Platonem dixit) audientes frangeret ; quod nemo unus fuit vir , quo magis innixa res literaria Pisis steterit ; quod a nemine umquam iuvenum studiosorum , ne ipsis quidem voluptariis , ignavisque demptis , ei non fuerit assurrectum ; quod omnes illum non venerarentur solum , sed plane in oculis ferrent ; non tam eius doctrinae , ac probitati , quam singulari cuidam , quae in eo residebat , humanitati tribuendum . Cum autem eius domus , tamquam sapientiae templum , omnibus perbenigne pateret , ad eum frequentissimi ventitabant non solum discendi avidi adolescentes , sed doctissimi ac nobilissimi homines tum eius sapientia , tum comitate illecti , ac pertracti . Non enim solummodo plenum honoris , & gloriae putabant in tam praeclari viri consuetudinem recipi , sed suavissimo eius colloquio frui ipsis erat multo iucundissimum . Gravis fi-

quidem illi sermo , disertus , copiosus , & mire sapientiam redolens , at cum res postulabat , acutus , & salibus scatens lepidissimis , ac festivissimis . Nam qua erat mentis sagacitate , non frigidos & insulsos , sed antiquae festivitatis sapore iocos proferebat . Ceterum ut sapientiam facilius afflaret iuvenibus , median-
inter Stoicos , & Epicureos insistendam esse viam prudenter censuit , videlicet nec omnem voluptatem cum illis repudiandam tamquam hostem , neque cum his summum bonum in voluptate ponendum , sed amplectendam laetitiae sobrietatem , alacritatemque lascivia carentem excogitandam . Et miramur ultro ac libentissime studiosos iuvenes huic Viro adhaesisse , eosque , quos domi alebat , spectatissimos plane ac nobilissimos adeo eius contubernio , consuetudine , institutione delectatos esse , ut mallent disciplinae iugo penes illum manere subiecti , quam pleno iure libertatis obtento , cuius tam avida est aetas illa , ac studiosa , ad vivendi licentiam dimitti ? In uno scilicet , eodemque homine , & praeceptoris sapientia plenissimi , omniaque , quae ipse sciret , tradendi aliis cupidissimi , & amantissimi patris in illorum bonum ex animo excubantis , & amici candida fide , ac morum facilitate probatissimi simul collectas partes videbant , atque experiebantur . Quid plura ? Si quando ipsis indignari cogeretur , & a recto tramite deflectentes coarguere , tanto lepore , gratia , benignitate increpationem condiebat , ac deleniebat , ut
vel

vel tum, infueto exemplo ac perraro, adolescentibus probaretur; cumque iuvenes natura ita affecti sint, ut arguentem oderint, castigatique remordeant: ii contra, illum arguentem seipsos aequanimiter ferrent, castigantemque diligerent. Adeo in comperto est laetam severitatem, & sine odio institutionem egregia indole adolescentibus adhibitam duro ac tristi regimine multo esse conducibiliorem. Multa alia profecto mihi suppetunt dicenda commoda, quae ex tanta humanitate ad aliorum utilitatem profluxerunt. Sed immensum est explicare omnia. Itaque parcite, auditores, si ad exitum properans, eorum aliqua cursim attingo, non immorando explico. Puto igitur humanissimae eius indolis, & ad alios iuvandos propensissimae fuisse non solum summa diligentia atque assiduitate tradere iuvenibus eam doctrinam, ad quam profitendam fuerat auctoratus, sed reliquam eruditionem, quam sibi uberime comparaverat, nemini invidere, atque ipsa Graecae linguae rudimenta (quod certe multarum literarum viro, atque occupatissimo grave sit, ac permolestum) non raro explanare. Sed & amicis mutuum dare aurum nullo foenore solenne habuit, nec umquam facti poenituit, quamvis commodatae aliquando pecuniae iacturam fecerit, fidem eo; qui acceperat, non servante. Quod si fuit, qui doceret ad Deos prope accedendi rationem in eo sitam esse homini, ut quam paucissimis indigeat, & quam plurimis benefaciat, neminem arbitror ad illos fa-

factum esse Iosepho propiorem . Tam paucis si-
quidem , quae ipse ad vitae usum adhiberet ,
contentus erat , ut vocem illam Socratis ad nun-
dinas Athenis celebrari solitas egressi usurpare
posset , *Heu quot non egeo !* Tam vero multa
impertiri aliis beneficia consuevit , tam largis
frequentibusque subsidiis pauperum inopiam ex
Evangelii praecepto clanculum erigere , ut pro
suo genere , & conditione nemini liberalissimo-
rum secundus habendus sit . Nonne illis , quos
praeclaris laboribus defudantes videret , & rem
literariam insignium Operum evulgatione ampli-
ficantes , opportunam opem magnificus tulit , bo-
nam pecuniae summam , qua grandes typorum
impenſas ferre possent , non mutuam , sed dono
datam impertiendo ? Nonne libros , quos para-
verat , tum domi suae legendos quibuslibet ac-
cedentibus libentissimo animo exhibebat , tum
etiam alio asportandos , ut studiosorum commo-
ditati deserviret , sine tristitia permittebat ? Non-
ne quomodo haec benignitas ad studiosos ado-
lescentes post obitum etiam suum protraheretur
cogitavit , suamque bibliothecam ad publicam
utilitatem Pisis proſtare supremis tabulis voluit ?
Nonne aegrotos Valetudinarii Fratrum , quos vo-
cant , Hospitalitatis heredes scripsit , quod pium
illud miserorum perfugium tenui censu susten-
tari nosset ? Haec vero ideo recensui multis aliis
praetermissis , auditores , ut qualis fuerit eius hu-
manitas , pernoscat ; nimirum non solo con-
ſtans officioso verborum genere , sed factis prae-
cla-

clarissimis abundans. Existimo autem sapientissimum Philonem, ubi virtutum reginam humanitatem praedicare non dubitavit, talem quidem animo reputasse humanitatem, qualem in Iosepho Averanio sumus demirati. Verborum siquidem humanitas, quae factis careat, vacua est, atque infrugifera; quae vero factis prodest, sed verborum gratiam non habet adiunctam, utilis illa quidem, sed non omnes implet numeros. Cum igitur incredibilem simul nullo artis furo verborum comitatem quamdam, simulque beneficentiam factis insignem Averanius exhibuerit; nonne iure optimo quemadmodum vobis antea mirificum exemplum doctrinae, & probitatis iam praedicavi, ita modo humanitatis etiam fuisse contendam?

Iam vero vos mea compellat oratio, ornatissimi adolescentes; ad vos siquidem cohortandos magis, quam ad Averanium laudandum, cui gloriae satis est, illam me esse elucubratum ipso dicendi initio testatus sum. Auferte bonam huius auscultationis mercedem, studiosam tanti viri laudum aemulationem. Ad eius normam vos ipsos similiter fingite doctos, probos, humanos. Antipater Rex Macedoniae mandaverat Archiae, ut Demosthenem ad se adduceret, qui cum non potuisset vivum afferre, urnam attulit, in qua eius erant exuviae. Equidem simili ratione vobiscum egi, optimi iuvenes. Cum Averanium, quem tribus ab hinc annis caelum terris invidere visum est, viventem iam nequiverim vobis com-

commonstrare , ut ad illum tamquam vivum gurgitem sapientiam haušturi accederetis (quae felicitatis pars aliis ante vos iuvenibus contigit) exuvias saltem afferre volui , ut eas venerantes , atque exosculantes ad sapientiam non minus inflammemini , quam si coram vivum videre , & audire liceret . Sic & Miltiadis trophaea generosum iuvenem Themistoclem e somno saepe excitasse dicuntur , & Achillis sepulcrum in Sigaeo Magno illi Alexandro praeclarae aemulationis lacrymas excivisse . Averanii igitur exuviis , hoc est praeclarissimis ab eo relictis exemplis vos pariter studio aemulationis incendi aequum est . Maſti virtute , Florentini iuvenes , este . Hac quasi cote ferrum virtutis vestrae acuite . Non me fugit longe eminentiora , & acriora ingenia , quam aliis , caeli huius beneficio vobis obtigisse ad doctrinarum vel abstrusissimarum studia feliciter capeſſenda . Nihilominus diligentia , labore , assiduitate , vigiliis opus est , si celsum aliquem in doctrina gradum tenere vultis . Quis Averanio ingeniosior , perspicacior , solertior ? quis tamen illo literario labori addictior ? quis ignaviae , otii , & eorum omnium , quae a studio avocant , hostis infensior ? Non licet vobis fingere , adolescentes , aut sperare Hesiodi laurum , quae vel ociosis pastoribus poëticen inspirabat , aut nihil agentibus in finem literas devolaturas . Quod si vobis sollicitudinem , cumque in doctrinae consecratione praecipio , multo etiam sollicitiores volo in consecranda
pro-

❧ (XXVII) ❧

probitatē . Ne finite doctrinae pulcritudinem vitiorum coeno commaculari . Quam pulcrior , quam laetior , quam decentior erit vobis doctrina , si sociam illi probitatem asciveritis ! Quod si geminis illis veluti deabus tertia accesserit humanitas , iam vestrum fiet pectus trium harum quasi Gratiarum sacerrimum templum . Credite , iuvenes , mire decet doctum , ac probum virum affabilitas , comitas , beneficentia . Mores hispidos , agrestes , rudes vera doctrina , ac probitas non patiuntur , quae magis natae sunt ad animum omni humanitate expoliendum .

BENIGNO LECTORI .

Probe novi & candide fateor testimonium perfectae laudis oratione mea Iosepho Averanio me reddere non valuisse , amice Lector . Faciam igitur , quod olim Aesculapii sacerdotes in more habuisse dicuntur . Si enim bonum deesset sacrificantibus poema novum , decantabant ei Alisodemi , & Sophoclis versus , quibus maiorem putabant Deo haberi honorem . Ego similiter , ut digne apud te Averanius laudetur , nitidissimam potius Inscriptionem proponam , quam ab hinc biennio elucubrauit , & marmoreo monumento in sacro D. Marci peristyllo insculpi curavit nobilissimus , atque eruditissimus Vir Antonius Nicolini ex Marchionibus Pontis Sacci , & Castri Camuliani . Tam siquidem vera est , tam succo plena , tam bono antiquitatis sapore imbuta , tam
ele-

❧ (XXVIII) ❧

*elegans , tam Latina , ut recte senseris , si hac mea
nupera inornata , minusque nervosa laudatione post-
habita , veterem illam decensiore , ac praestan-
torem indicaveris ad singularia tanti Viri merita
corcelebranda .*

IOSEPHO AVERANIO

CIVI FLORENTINO BENEDICTI ET NICOLAI FRATRI
IN PISANA ACADEMIA LIII ANNOS LEGVM INTERPRETI
IURIS CONSULTORVM SUI TEMPORIS MAXIMO
PHILOSOPHIA GEOMETRIA ASTRONOMIA
GRAECIS LATINIS LITTERIS POESI ELOQUENTIA
ROMANAE HISTORIAE COGNITIONE CLARISSIMO
RELIGIONE MORIBUS SPECTATISSIMO
PRAECEPTORI OPTIMO
QUI VIXIT ANN. LXXV MENS. V. D. IV
OBIIIT IX KAL. SEPT. ANNO A CHRISTO NATO
MDCCXXXVIII

ANTONIUS NICOLINIUS
EX MARCHIONIBUS PONTIS SACCI
ET CASTRI CAMULIANI
H . M . D . S . P . F . C .

2
1107.9

